

Na osnovu člana 125. Statuta Općine Bugojno ("Službene novine Općine Bugojno", broj: 7/07), Općinsko vijeće Bugojno, na sjednici održanoj 19.05.2008. godine, donijelo je

O D L U K U

o izmjeni i dopuni Statuta Općine Bugojno

Član 1.

U Statutu Općine Bugojno ("Službene novine Općine Bugojno", broj: 7/07) u članu 20. u stavu 3. u prvom redu iza riječi vijećnika umjesto zarezav stavlja se tačka a briše se tekst u nastavku "od kojih su 2 (dva) vijećnika iz reda nacionalnih manjina".

Član 2.

U članu 37. Statuta tekst u drugom redu "Općinski načelnik obavlja dužnost za vrijeme mandata na koji je izabran" mijenja se i glasi: "Mandat načelnika traje četiri godine i vezan je za mandat saziva Općinskog vijeća".

Član 3.

U članu 38. Statuta u stavu 2. iza riječi vijeća umjesto zarezav stavlja se tačka, a briše se tekst u nastavku "a najkasnije u roku od trideset (30) dana od dana dostave prijedloga predsjedavajućem Općinskog vijeća".

U istom članu iza stava 2. dodaje se stav 2a) koji glasi: "Odluka o pokretanju opoziva načelnika donosi se većinom glasova od ukupnog broja vijećnika u Općinskom vijeću" a iza stava 6. dodaje se stav 6a) koji glasi: "Odluka građana iz prethodnog stava je obavezujuća za Općinsko vijeće i općinskog načelnika".

U istom članu stavovi 2. do 6. postaju stavovi 2. do 7. a stavovi 6. do 7. postaju stavovi 7. do 8.

Član 4.

Iza člana 38. Statuta dodaje se član 38a) koji glasi: "Mandat načelnika izabranog na prijevremenim izborima teče do redovnog isteka mandata Općinskog vijeća."

Član 5.

U članu 39. Statuta mijenja se stav 1. i glasi: "Dužnost načelnika u slučaju prestanka mandata u skladu sa Zakonom i u slučaju opoziva u smislu člana 38. ovog Statuta, do ponovnog izbora načelnika, vrši osoba izabrana od Općinskog vijeća natpolovičnom većinom od ukupnog broja članova Općinskog vijeća".

U istom članu stav 2. se briše.

Član 6.

Iza člana 39. Statuta dodaje se član 39a) koji glasi: "Načelnika za vrijeme privremene odsutnosti ili spriječenosti zamjenjuje dužnosnik ili djelatnik općinskih organa uprave kojeg on ovlasti".

Član 7.

Zadužuje se Komisija za statutarna pitanja i propise Općine Bugojno da sačini prečišćeni tekst Statuta Općine Bugojno.

Član 8.

Ova Odluka stupa na snagu osmog dana od dana objavljivanja u "Službenim novinama Općine Bugojno".

Broj: 02-02-001666/08
Bugojno, 19.05.2008. godine

**PREDSJEDAVAJUĆI
OPĆINSKOG VIJEĆA**

Ante Visković, s.r.

O B R A Z L O Ž E N J E

Članom 125. Statuta Općine Bugojno ("Službene novine Općine Bugojno", broj: 7/07) regulisano je da o izmjeni i dopuni Statuta Općinsko vijeće donosi odluku, a da Općinsko vijeće može donijeti odluku bez prethodne rasprave, kada se radi o usklađivanju Statuta sa zakonom.

Predložena odluka o izmjeni i dopuni Statuta Općine Bugojno je upravo takva kako je predviđeno u naprijed navedenom članu jer se radi o usklađivanju Statuta sa nedavno donešena dva zakona i to:

1. Zakonom o izmjenama i dopunama izbornog Zakona Bosne i Hercegovine ("Službeni glasnik BiH", broj: 33/08),
2. Zakonom o izboru, prestanka mandata, opozivu i zamjeni načelnika općina u Federaciji Bosne i Hercegovine ("Službene novine Federacije BiH", broj: 19/08).

Općina Bugojno je na sjednici Općinskog vijeća održanoj 16.12.2007. godine donijela Statut Općine i sa tadašnjim poglavljem 13. Izbornog zakona Bosne i Hercegovine izvršilo usklađivanje Statuta u smislu da je u članu 20. Statuta utvrđeno da Općinsko vijeće ima 2 vijećnika od ukupno 25 vijećnika iz reda nacionalnih manjina.

Nakon donošenja Zakona o izmjenama i dopunama Izbornog zakona BiH ("Službeni glasnik BiH", broj: 33/08), od strane Centralne izborne komisije BiH dobijen je akt, broj: 05-1-02-3-1994-1-90/07 od 29.04.2008. godine kojim se Općinsko vijeće Bugojno obavještava o potrebi usklađivanja Statuta Općine sa odredbama Izbornog zakona BiH. Uz akt dostavljen je kao prilog davanje prijedloga mišljenja za autentično tumačenje odredbi zakona upućeno Vijeću ministara BiH od strane Ministarstva za ljudska prava i izbjeglice BiH.

Imajući u vidu prijedlog tumačenja Ministarstva a i sada važeće odredbe-poglavlje Izbornog zakona o učešću pripadnika nacionalnih manjina u izborima za općinski nivo, postoji potreba izmjene Statuta Općine Bugojno vezano za tu problematiku. Naime, kada je Statut donosivan krajem 2007. godine nisu bila jasna tumačenja oko statusa nacionalnih manjina pa je Općinsko vijeće imajući u vidu podatke o popisu stanovništva iz 1991. godine bilo zauzelo stav da su nacionalne manjine sve osim konstitutivnih naroda, pa je odredilo Statutom dva vijećnika iz reda nacionalnih manjina u ukupnom broju od 25. vijećnika.

Imajući u vidu da je sada članom 13. 14., stav 2. Izbornog zakona utvrđena obaveza regulisanja statutom općine učešća najmanje jednog mjesta u vijeću pripadnika nacionalnih manjina s više od 3% u ukupnom broju stanovništva prema popisu stanovništva iz 1991. godine u općini Bugojno, a naročito imajući u vidu da je prijedlogom tumačenja Ministarstva jasno utvrđeno da "Jugoslaveni" ne pripadaju skupini manjinskih zajednica u smislu Zakona o zaštiti prava pripadnika nacionalnih manjina Bosne i Hercegovine, to postoji potreba izmjene Statuta Općine Bugojno u smislu brisanja odredbe u članu 20. Statuta o broju od 2 vijećnika iz reda nacionalnih manjina.

Naime, prema zvaničnim statističkim podacima iz 1991. godine, osim Hrvata, Muslimana (Bošnjaka) i Srba u općini Bugojno bio je 1.561 Jugoslaven i 927 ostalih. Zvanično je Bugojno brojalo 46.889 stanovnika.

Ostale odredbe prijedloga odluke o izmjenama i dopunama Statuta Općine Bugojno su usklađene sa odgovarajućim odredbama Zakona o izboru, prestanka mandata, opozivu i zamjeni načelnika općina u Federaciji Bosne i Hercegovine ("Službene novine Federacije BiH", broj: 19/08).